




Literatura den Bon Dia

Ernesto E. Rosenstand



TUR COS A KEDA ATRAS

E cu semper a busca manera pa dun'e loke e tabata por pa hacie felis. Y awor ate ta sinta ta skirbi e carta di despedida. Un despedida cu lo ta pa semper, pasobra con cu bai bin nunca hamas lo e por tin e cara di bolbe mira Jacinto den su cara.

Di enfrent'e cara cara pa splik'e miho pakico el a haci esaki. Maske e mes no tabata sa di con el a tuma e decision aki. Awo na e momentonan aki cu e tabata busca manera pa pone su pensamentonn na orden pa por splica Jacinto su actitud, e no tabata sinti ningun sorto di duele cu lo e bandona su casa. E tabata sigur di su mes.

Den su pensamiento Juan tabata e amante ideal cu por a dun'e tur loke cu e tabata por y tur loke cu e tabata desea fisica y mentalmente. Straño di tur esaki tabata cu den asina un tempo cortico e por a cambia di idea. Mas y mas e tabata idolatra Juan. Lo di pio di tur eski tabata cu e tabata lubida cu e no tabatin ningun laso cu ta mar'e na Juan.

Loke tabata move pa haci loke cu e tabata bai haci tabata puramente pasion, di ambos banda. Pues loke cu e tabata bai haci tabata un aventura cu hopi riesgo, pa no bisa cu tabata un locura.

Na e momentonan aki e tabata parce e mucha mohe cu a caba di haya su prome sunchi cerca e yoncuman cu e tabata stima y dor di e hechizo di e sunchi aki e ta perde sentido di realidad. Esei tabata su caso.

Delaster dianan el a perde sentido di realidad. E tabatas biba yen di ilusion. Tur cos p'e tabata felicidad na e momentonan ei. Den su imaginacion e tabata mira futuro hopi radiante. Por fin lo e hiba un bida sin ningun sorto di preocupacion. Esei tabata di spera.

Asina Carmen tabata sintie dilanti di e pida papel cu e mester a yena pa di e manera aki laga testimonio di su traicion. E no tabata consciente cu loke cu e ta bai haci ta algo cu ainda mester proba cu en berdad lo trece p'e felicidad. Por haci e pregunta takico e tabata yama felicidad. Tabata e glamour di promesanan fofo. O e tankilidad di un bida matrimonial sin ningun kibramento di cabe. Unda cu tur dos ta respeta otro. Pregunta y mas pregunta. E tabata lubida cu sinta dilanti di e papel pa 'e skirbi e carta tabata su realidad. E realidad cu e tabata lagando atras. Algo cu a demostra cu e por ta felis y cu e no mester bai hinca su curpa den aventuranan dudoso. Promesanan sin pia ni cabe. Ma su plan tabata cla.

Henter su ser tabata anhela di por bai for di Ruba lo mas lihe posibel. No cu Aruba tabata malo p'e, ma ya den su curpa e sed di aventura a cuminsa domin'e. Palabranan di Juan a haci nan trabou. Con bunita lo tabata ora cu e cu Juan so lo haya nan den un luga unda ningun hende conoce nan.

Unda cu nan tur dos por cuminsa cu un bida nobo. Maske no tabata sa con esaki lo bai desaroya. Unda nan por biba liber y no scondi manera nan tabata biba aki na Ruba delaster tempo. Esei mes no tabata bida. Hende mester ta frqnc pa cu su mes. Anto e ora e port a esaki pa

cu e otronan.

Den extranhero nan por biba manera tur otro hende. Unda bo no tin mester di tene cuenta cu otro. Esei ta haci bo mucho mas liber. Bo tam as un numero cu un persna. Y si nan bai un stad grandi ta mucho miho ainda, den stadnan grandi bo ta un number den e cantidad di hende cu ta biba den e luga ei.

Nan no conoce bo y abo tampoco conoce nan. Esei mes ta duna bo un libertad enorme. Den stad grandi bo por ta bo mes y no manera na lugarnan chikito unda cu bo mester duna cuenta na pushi y cacho di tur loke bo ta haci y tin biaha te asta di loke bo tin intencion di haci. Y loke bo no kier haci.

Tur hende conoce tur hende y tur hende kier sa cu nan tur tin derecho di hinca nan curpa den bida di otro. Loke hopi biaha ta crea problema den biba di otro. Tur e pensamentonan aki tabata pasa den su mente asina lihe y asina cla cu e tabata desea di bai lo mas lihe posibel.

E no por a wanta e presion aki. Maske e tabata aparenta otro. Maske e tabata busca manera pa elimin'e for di su cabe, ma esei e no tabata logra completamente. Por fin el a bin cla cu su carta y despues di a cer'e cu cuidou el a bai paketa su cosnan.

Esei no a tum'e mucho tempo, pasobra delaster dianan el a pone practicamente tur cos cu e kier a hiba cla. Poco poco y scondi scondi e tabata prepara su biaha. Poco poco el a cuminsa prepara su cosnan. E kier a hiba lo necesario. Esei mes a haci cu e no tabatin mucho di paketa. Den un rato di ora el a bin cla.

Y no a pasa mucho tempo cu Juan a bin busk'e. Ta bon mes, pasobra e no por a soporta e presencia di tur e cosnan den cas cu tabata trece acuerdonan grato. E tabatin miedo cu mas y mas lo e cuminsa duda di loke cu e tabata bai haci. Y cambia di idea.

Unda cu e bira e tabata sinti presencia di Jacinto y p'esei e tabata desea pa Juan bin lihe. Loke tambe a sosodeya cu Juan tambe tabata den e mes un boto. Loke berdad a sosode. Asina esaki a para auto dilanti di su cas el a hala rosea hundo, un rosea di alivio, un rosea di liberacion.

Prome cu el a sali el a tira un bista riba tur e cosnan cu tabatin cerca dje. Y cu un tempo tabata asina sagrado p'e. No p'e so ma pa nan dos. Y awor e mester laga nan pa bai drenta den un scuridad completo.

Y den un momento e no por a soporta mas e emocion di e partida aki. Y lagrimanan a cuminsa brota fo'i su wowonan. Pura pura el a busca manera pa domin'e, ma sin ningun resultado. Emocion e momentonan ei tabata hopi fuerte.

Su wowonan tabata expresa loke su curason tabata nenga di demostra – duele di bai!